

## **Naqqiut**

Taarserpaa saqqummiussissut 03. november 2022-meersoq  
(Kalaallisuuani oqaatsinik allannguisoqarnera pillugu)

**Kalaallit Nunaanni Danmarkimilu ilinniartoqarfiit peqqinnissamut tunngassutillit akunnerminni suleqatigiinnissamut isumaqatigiissusiornissaannut suliniuteqartoqassagaluarpat pitsaaqutit iluaqutissallu misissornissaannut suleqatigiissitamik pilersitsinissamut Naalakkersuisut peqquneqarnissaanik Inatsisartut aalajangiiffigisassaattut siunnersuut. Suleqatigiinnissamut isumaqatigiissut sumiiffinni nittartagaq aqputigalugu ilinniakkanik qaffassarnerit pikkorissarnerillu atorneqarsinnaaneri qulakkiissavaat. Tamanna inuiaqatigiinni sumiiffiit ilaanni isumaginninnikkut peqqinnissatigullu immikkut ilisimasalinnik pisariaqartitsinermut naaperiaataassaaq. Suleqatigiissitap suliani UKA 2023-mi naammassisimassavaa.**  
(Inatsisartunut, Anna Wangerheim, Demokraatit)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Naalakkersuisut sinnerlugit aalajangiiffigisassatut siunnersuut pillugu Inatsisartuni ilaasortaq Anna Wangerheim, Demokraatit, qutsavigerusuppara.

Nunatsinni ilinniartit aamma nunani allani ilinniartit suleqatigiinnissamik isumaqatigiissuteqartarnissaannik isuma ajunngitsuvoq. Nunatsinni suliffissaqarnikkut tamatigut sulisut piginnaasaasa nukittorsarneqarnissaat anguniarlugu Nunatsinni ilinniartit ilinniartitaanernik, ilinniaqqinnernik aamma pikkorissaanernik neqerooruteqartarnermi inerisaajuarnissaat Naalakkersuisut alaatsinaappaat, taamatuttaaq ajornanngikkaangat peqqinnissaqarfippat aamma ilanngullugu.

Peqqissaanermik Ilinniartit Danmarkimi ilinniartit assigiinngitsut suleqatigai. København Universitetimi Skolen for Klinik Assistentter og Tandplejere ilinniartitsinerit tamaasa isumagisarpai aamma kigutit pillugit suliffinnik misiliinerni alimasissumit ilinniartitsinerit isumagisarlugit. København Professionshøjskole aamma suleqatigineqarpoq, taassumalu immikkut piginnaasaqalernissamut ilinniartit isumagisarpai, inerisaanerlu ingerlanneqarpoq siunissami taakku akademimi ilinniartitaanertut neqeroorutigineqarsinnaanngornissaat anguniarlugu. Ilisimatusarfimmi Peqqissaanermik Pinngortitalerinnermillu Ilisimatusarfimmi ilinniaqqittarneq pillugu inerisaaneq aamma ingerlanneqarpoq, taannalu siusinnerusukkulli UCL Vejle aamma Odense ilinniartitsisunik ataasiakkaanik isumaqatigiissuteqarsimavoq. Peqqissaanermik Pinngortitalerinnermillu Ilisimatusarfimmi taamatuttaaq diplomimik allagartartaarniarluni ilinniartitanerit peqqissaasunut ilinniaqqinnerit nukittorsarniarlugit misissorpai aammalu København Professionshøjskolep, UCL Vejle aamma UCL Odense kiisalu Dronning Ingridip Napparsimavissuata ataatsimeeqatiginissaat misissorlugit sulii ilinniaqqinnerit pikkorissaanerillu allat misissornissaat tunaartarlugit.

Nunatsinni Danmarkimilu ilinniartit akornanni suleqatigiinnissamik isumaqatigiissutit taamaattumik pilersinneqareersimapput tulluartutullu nalilerneqaraangata nunatsinnilu ilinniartit atornerqartarlutik.

Peqqinnissaq pillugu ataatsimiititaliarsuup ataani misissuinerit annertuut maannakkut ingerlanneqarput, tassanilu peqqinnissaqarfimmi kommuninilu sulisunut ilinniartitaaneq aamma piginnaangorsaaneq pillugu suleqatigiissitaq pilersinneqarsimalluni. Peqqinnissaq pillugu ataatsimiititaliarsuup peqqinnissaqarfimmi siunissami tulleriarinissamut innersuussutai Naalakkersuisunut saqqummiunneqassapput kingusinnerpaamik Inatsisartut 2023-mi upernaakkut ataatsimiinnissaanni, ilaatigullu tassani peqqissaanermik ilinniartit ilinniartussarsiornermut ilinniakkamillu taamaatitsinnginnissaq anguniarlugu, piginnaangorsarneq aamma ilinniaqqinneq kiisalu ilinniagaqarsimanngitsunik ilinniakkanillu sivilisunngitsunik ilinniarsimasunik peqqinnissaqarfimmi kommuninilu sulisunik piginnaangorsaanerit saqqummiunneqassallutik.

Aamma alimasissumit ilinniartitseriaatsip ilinniartitaanermi politikikkut tulleriarinermi salliutinneqarnissaa Naalakkersuisut toqqarsimavaat, taannalu nukittorsarneqarlunilu atornerqassaaq nunatsinni inunnik isumaginninnermi peqqinnissaqarfimmilu sulisut ilinniartitaaneranni alimasissumit ilinniartitseriaaseq naleqquttuusorinartillugu najukkani ilisimasatigut piginnaasatigullu kivitsinissaq qulakkeerniarlugu.

Suliassaqarfimmi suleqatigiinneq pioreersoq innersuullugu, alimasissumit atuartitsisarnerup nukittorsarneqarnissaata aallartinneqarsimanera, ilanngullugulu pissusissamisuussammat Peqqinnissaq pillugu ataatsimiititaliarsuup Naalakkersuisunut inassuteqaatissaasa utaqqineqarnissaat Naalakkersuisut siunnersuut itigartinneqassasoq inassutigissavaat.